

欽定剿平粵匪方略

欽定剿平粵匪方略卷八十一 甲寅年

二月二十日 己丑 崇綸青慶奏言現在賊船多半

竄往金口又赴上游屢遣弁兵跟蹤確探均至
中途阻截湖南驛路梗塞賊船是否盡竄岳州
有無分擾別慮尙未能悉其漢口仍留賊船二
百餘隻因畏礮擊匿於小河之內乘夜暗放上
下潛遊每日轟燬數隻不等賊匪約有千餘艘

踞漢陽漢口兩處忽聚忽散詭譎莫測湖北之
舊礮船前經臣崇綸添湊已有百隻今復失散
所餘無多臣於去臘趕造礮船大小二百餘隻
因候廣東解楚洋礮經湖南截留未到不能應
用將軍台湧兼署提篆統轄滿漢官兵茲賊旣
赴岳州荊州德安無事自應來省籌勦漢口賊
匪又臣等前調四川防堵巴東等處官兵二千

名移紮漢鎮迄今未接四川督臣覆音合無仰
懇

天恩飭催前來接濟並請

飭下台湧迅爲辦理聞提臣佈克慎等有赴德安之說
現復飭令招聚將弁兵勇隨同台湧直抄漢口
賊後約會臣等遣發舟師渡江接應如俱不能
前來臣等惟有備齊船礮親率官兵以作背城

一戰之舉奏八

上命軍機大臣傳諭崇綸青麀曰台湧勢難遽赴武昌
防守省城崇綸青麀自以力捍危城爲要此股賊匪
旣係烏合之衆長髮賊目無多台湧兵到漢陽不難
克復其省垣重地仍責成該撫等竭力防堵若擅離
城池致有疏失朕惟崇綸青麀是問楚北賊勢蔓延
大股已竄過岳州現在荆襄一帶該逆是否分股旁

竄並著速行偵探隨時奏聞

上又命軍機大臣傳諭台湧曰現在賊匪已竄岳州其荆襄一帶是否另有股匪滋擾曾國藩水軍甫抵湘潭不能遽援楚北連日據崇綸等奏漢陽一帶逆匪半係烏合之衆其長髮老賊爲數無多自不難於剿滅著台湧卽督率將弁探賊所向痛加剿洗無得株守德安荊州襄陽各路是否已有賊蹤抑由何處分

竄並著迅速查明具奏

上又命軍機大臣傳諭陳啟邁陸元烺曰前因賊船竄擾漢陽金口一帶已諭陳啟邁飭派得力水師員弁管帶礮船駛出九江斷賊往來之路現在湖北上游下游賊船肆擾著陳啟邁仍遵前旨迅卽配齊礮船派委得力將弁由南昌九江星速駛赴楚北會同進剿如礮船一時驟難齊備亦必須先撥精兵二千名

派員管帶由陸路前往湖北援應該撫等務當合力
攻剿遏楚北之兇鋒卽可保潯江之門戶此時陳啟
邁如尙未到任卽著陸元煊先行遵旨籌辦

同日王履謙長臻奏言查逆匪復擾楚皖黃河
防守事宜急須豫爲籌計如皖省以歸德府屬
劉家口爲最近楚省以汜水滎澤等口爲要區
萬一大股齊來臨流欲渡彼時卽將船隻鑿沈

燒燬或卸去桅柁或收集北岸而賊之造舟結
筏未必不計日可成北岸雖有守兵究恐力有
不逮劉董二口南岸臣長臻咨商河南撫臣酌
派兵勇赴該處駐紮惟能否撥付若干尙未接
准咨覆豫境防河兵勇祇九百名東境祇五百
名深慮顧此失彼防範難周臣等亦知鄰省在
在設防勢難再事徵調惟防北尤須防南守近

不如守遠合無仰懇

天恩飭令山陝兩省中就近挑選勇敢官兵二千名並
熟悉營務將弁數員帶領迅速來豫由臣等酌
量地方妥爲布置

同日百勝王夢齡奏言安徽逆匪由永城夏邑
竄入徐州碭山縣境後二月十三日突有大股
三四萬人見豐工以下黃河乾涸屯踞南北兩

岸各村莊意圖分道直趨徐州城垣緊靠黃河
大隄隄頂高出城堞丈許形如釜底且北岸係
通京驛道必須在上游夾岸扼守庶可保衛郡
城兼可遏賊北竄之路紳士張夢齡等所挑民
勇僅到一千餘人而南路探報永城又有逆匪
續至宿州甚爲喫緊此時惟有殫力堵禦一俟
袁甲三所派兵勇並各鄉民勇到齊卽行分路

進勦至豐工口門以下水勢平緩竊慮該逆過
河竄擾該處偏近豫東現與徐州隔絕相應請
旨飛飭豫東兩省迅速派兵在要隘處所嚴密防堵並

懇

飭派大兵星速來徐勦辦均奏入

上命軍機大臣傳諭王履謙長臻曰逆匪偏近徐州歸
德等處援兵不能遽集王履謙長臻巡防河岸是其

專責著卽就現有兵勇派撥扼要防守仍須親身往來督飭地方河工員弁等稽察河口毋使奸細乘閒偷渡並與山東河南互相知照以期聲勢聯絡

上又命軍機大臣傳諭百勝王夢齡曰徐州逼近黃河爲南北要衝且係糧臺重地該總兵等務當體察情形一面扼賊北竄之路一面捍衛城池保守糧臺毋得顧此失彼任賊闖入並著將現在防勦賊匪情形

隨時奏報

上又命軍機大臣傳諭僧格林沁勝保曰徐州爲南北要衝不可不嚴爲防範本日已諭令琦善撥兵援應並令袁甲三由宿州馳赴該處扼守尙未知能否分撥赴援且均在徐州以南而北路空虛甚屬可慮著該大臣等仍派得力大員帶兵一千名迅速前往協剿並偵探歸德一帶情形酌量何路緊急卽帶兵由

何路截擊張亮基現在景州一帶崇恩亦隨大營勦賊本日已諭令張亮基酌量情形或該撫自行帶兵前往令崇恩赴景州防勦或令崇恩前往徐州該大臣卽就近與張亮基籌酌辦理阜城賊匪攻勦情形如何該大臣等未能速殄賊氛致大兵爲所牽掣勢且貽誤大局罪將誰諉耶

上又命軍機大臣傳諭琦善曰據百勝等奏安徽逆匪

由永城夏邑竄入碭山現在突有逆匪三四萬人在
豐工以下屯踞南北兩岸村莊意圖直趨徐城該處
爲南北咽喉且係糧臺重地斷不可任匪蹤闖入該
大臣勦辦瓜州賊匪固屬喫緊之時惟該逆北竄尤
爲可慮著琦善迅卽抽撥精兵一二千名派委得力
將弁管帶馳赴徐州協勦

上又命軍機大臣傳諭袁甲三曰據百勝等奏逆匪竄

八徐州碭山縣境賊勢猖獗兵力實形單弱徐州爲糧臺重地且係南北要衝甚爲喫緊本日已諭知琦善酌量派兵前往應援惟現在瓜州尙有賊匪恐兵力不能多分且道遠恐難應急該給事中現駐宿州前諭令和春酌撥精兵一二千名交袁甲三管帶未知會否趕到著卽將現有之兵勇迅速督帶前進與百勝等會合夾擊力挫賊鋒遏其北竄不可株守一

隅致誤事機

上又命軍機大臣傳諭張亮基崇恩曰徐州與東省毗連情形甚爲喫緊張亮基現駐景州杜賊南竄固爲要著而山東與徐州交界地方尤不可不嚴爲防範著該撫酌度情形或自行統兵折回南路堵截留崇恩駐紮景州或令崇恩帶兵前往徐州交界遏賊竄擾之路務當悉心籌畫毋誤事機

上又命軍機大臣傳諭英桂曰賊匪偏近徐州卽係永
城股匪由碭山一帶竄來其歸德等處是否另有賊
股竄擾昨諭陝西提督桂明帶兵一千五百名徑赴
歸德一帶迎頭截擊本日已飛催前進該撫與總兵
柏山在何處堵截徐廣縉等如何帶勇防勦務當隨
時奏報

上又命軍機大臣傳諭恆春曰安徽賊匪現由潁上蒙

城竄至河南永城夏邑復由碭山竄徧徐州甚爲猖獗著恆春卽於澤潞等處防兵抽撥一千名選派得力將弁管帶馳赴黃河以南探明匪蹤迎頭堵剿並扼賊偷渡北竄之路此項官兵卽歸桂明節制調遣毋稍延緩

上又命軍機大臣傳諭桂明日據王履謙長臻奏逆匪徧近豫省已諭令恆春於澤潞防兵內抽撥兵一千

名馳赴黃河以南迎頭截勦該提督著卽趕緊帶兵
由潼關直趨黃河南岸探賊所向扼要進剿所有山
西派往之兵及河南防兵均歸調遣本日據百勝奏
賊匪逼近徐州情形萬分喫緊桂明抵豫後熟籌輕
重如歸德一帶情形稍緩著卽帶兵馳赴徐州與百
勝等會合攻剿尤防賊匪沿河偷渡北竄萬勿遷延
觀望

二十一日庚寅張亮基奏言皖賊攻陷永城分竄

夏邑碭山至蕭縣之黃家口距徐州府數十里

查徐兗邊界前經臣委總兵雙齡帶兵五百名

駐防聲勢實覺單弱臬司厲恩官前駐江省宿

遷縣今聞揚賊多竄廬鳳該處事機稍緩且距

徐州尙近臣已飛札該司酌帶兵勇移往兗徐

邊隘與雙齡扼要堵剿賊若由蕭碭竄至徐州

該處黃河斷流由徐至兗無險可扼情形更爲
喫重北賊占踞阜城又成負嵎之勢臣分隊至
阜城縣屬漫河池北迎勦該逆避匿不出漫河
池南至景州四面低窪步騎不能展施阜城至
東境僻路甚多西可直竄臨清南可徑撲德州
設該逆抄襲臣後轉恐回師應援不及適接勝
保來咨囑臣扼守景德交界之劉智廟並遣崇

恩回東扼防臨清州屬之鄭家口臣現帶兵勇
撤回劉智廟該處距鄭家口五十里與崇恩所
帶兵勇聲息相通臨德兩路足資應援如北賊
未卽撲滅臣督同藩司專顧北路而以南路防
堵事宜責成臬司督辦若南路萬分緊要臣卽
統師南行留崇恩兼防臨德庶免顧此失彼奏
入報

二十二日辛卯 僧格林沁勝保奏言逆匪自被我

兵追擊連日獲勝訊據賊供僞丞相三人日夜
哭泣賊衆無不嗟怨臣等一面解散脅從有投
出者卽當分別辦理惟該逆詭詐異常未破之
村已密布鹿角樹柵五六層之多離村一二箭
之遠樹柵俱用鐵鎖鉤連我兵未能撲入臣等

現催大礮來營極力轟擊使賊不敢久踞查阜
城城內房屋無多積水之處十居八九該逆俱
在南關東關盤踞並踞有塔兒頭紅葉莊二處
如果堅守不出十日之後我兵挖濠工竣大礮
亦可調到卽極力進攻以期掃數殄滅臣等目
下雖籌畫戰守之計仍須豫防該逆南竄查阜
城縣南通景德二州西南南通鄭家口東南通連

鎮西通武邑鄭家口連鎮地方富庶久爲賊所
覬覦儘令竄踞攻勦更形費手現派藩司崇恩
仍統原帶山東官兵於鄭家口一帶扼要駐守
又王劉村孫家鎮二處爲通連鎮要道已派直
隸督標通永天津步隊官兵在彼扼守截其要
路至南路景州撫臣張亮基帶兵駐紮惟西路
武邑尙未派兵該處地勢平坦便於追勦若賊

西竄馬隊緊追截殺無難悉數殄除

僧格林沁勝保又奏言查阜城之賊已成釜底游魂而殄除究難剋日現在賊巢以北大兵堵截未便遽行撤動惟有揀派將軍善祿先行帶兵向南迎勦其阜城以北善祿去後布置不免稍疏現已飛調慶祺由河間帶兵來營臣等仍趕緊設法殲滅阜城賊匪儘旬日之內掃穴擒

渠彼時再請

旨於臣僧格林沁臣勝保二人中

飭派一人督師南下如賊守尙堅急切未能得手或留

臣僧格林沁在此勦辦臣勝保移師繼善祿之後前往迎勦此時南寇方張北賊已蹙但能斷絕南援則北賊指日可滅竊料此股皖匪竟敢公然北來其鋒必銳雖烏合之徒不足當節制

之師然衆寡之勢大相懸殊則制勝之機終無把握近日用兵之弊往往諱言增兵及至萬不得已然後請增則賊勢已成情形又變杯水與薪卒歸無濟軍營一切委婉曲折有未能悉形於奏牘者如蒙

恩施格外俟直隸軍務辦有端倪准臣勝保入都親承訓示卽兼程疾赴一面派兵前行一面倍道詣

闕往返不過旬餘仍可趕上大隊不致耽延時日
僧格林沁勝保又奏言查該逆自初九日夜間
由東城等村潰竄臣等親督馬隊追勦臣勝保
並飛咨直隸總督山東巡撫飭屬嚴防臣等沿
途截殺該逆亡命南奔實無分股竄擾及盤踞
二十里堡之事其東城等村尙未竄出之賊早
經官兵搜殺淨盡卽河間以南阜城以北各處

聞有潛匿之賊或官兵搜殺或鄉民縛送並無
遺留惟賊蹤既去地方土匪揚言賊去復來乘
機搶劫或所不免臣等早於經過地方張貼示
諭嚴拏土匪並請

飭下直隸督臣通飭各州縣嚴緝土匪毋令擾害地方
並不得因土匪冒充賊匪妄行稟報再初十日
臣僧格林沁臣勝保督兵追勦申刻同抵獻縣

因各營馬隊俱多落後已到馬隊不敷追勦是以臣勝保與臣僧格林沁仍折回臧家橋催督後路馬隊又因軍情急須奏報上慰

聖廑擬定摺彙飭繕後卽督帶馬隊前進與臣僧格林沁先後抵富莊驛會商攻勦相隔約有一二時是日聞賊前隊南竄既有臣僧格林沁在富莊驛督勦臣勝保卽不得不先往追截是以於十

一日夜先行督兵直抵阜城現在該逆受此大創賊膽已寒臣惟有激勵將士乘此聲威揜渠埽穴萬不敢稍遺餘力奏入

上命軍機大臣傳諭僧格林沁勝保曰逆賊由豐工二壩渡河有直撲濟甯之信是山東情形尤爲緊急兗州一帶平原曠野無險可扼儘勦辦稍遲必至與徐州歸德之賊聯爲一氣僧格林沁等所派之兵卽著

飭令星夜起程毋庸俟慶祺來營致滋延誤阜城之賊顯係牽掣我師以待南賊來援卽著僧格林沁將該逆設法誘出盡數殲滅勝保著卽與僧格林沁商酌督帶馬步精兵進駐德州一帶爲善祿等後路策應該處爲水陸咽喉旣可杜南來之賊並可遏阜城賊匪南竄之路與僧格林沁軍營聲勢亦可聯絡勝保接奉此旨卽將如何分兵何日起程迅速馳奏至

阜城之賊尙有塔兒頭紅葉莊二處盤踞爲犄角之勢必須剋日攻勦掃除淨盡斷不准再延時日軍情緊急勝保旣前赴德州著毋庸來京陛見

同日張亮基奏言查豐工上下游水勢平緩並無大溜逆賊旣由該處偷渡其地與東省金鄉魚臺兩縣接壤由金魚北竄非兗州卽濟甯兗濟以北道路歧出無險可扼旣可由大道直達

德州亦可由間道徑撲省城儻被關入全省震動臣現祇帶兵五百名新練之勇二千餘名不敷分撥祇可將官兵盡數留於德州交道員姚錫華護守州城臣自帶練勇由劉智廟起程馳赴南路探賊所向扼要截擊惟德州防兵甚少北賊聞臣南行勢必竄撲德州卽臣馳赴南路亦恐賊勢猖獗兵力不足抵禦惟有仰祈

飭諭勝保就近先撥兵三千名趕緊前來防護德州並

乞

簡派大員統帶重兵馳赴東省應援俾南北兩賊不致
聯合南賊甫竄北路必畏馬隊且東省地多平
衍利於騎兵聞僧格林沁所帶馬隊甚爲驍健
可否酌派來東以扼北竄奏入

上命軍機大臣傳諭善祿張亮基曰逆賊現由豐壩偷

渡順隄西竄張亮基親督練勇二千名馳赴南路迎擊惟無官兵隨行深恐不敷勦辦著善祿卽將僧格林沁勝保由大營派撥之精兵二千五百名剋日統領起程與張亮基會合前進務卽探明賊蹤所向迎頭堵勦斷不可任令此股與阜城之賊聯絡勾結至濟南省城及南路金鄉魚臺一帶並附近豐北各偏僻要隘均著善祿張亮基嚴飭各該地方文武員弁

一體嚴密籌防毋稍疏失

同日英桂奏言查汝郡所屬州縣與楚省漢陽府屬接壤所有信陽羅山等處各關隘均派兵勇扼守惟光固一帶因六安失守捻匪四起疊飭該地方官痛加勦洗咨照鎮臣柏山督兵分馳各鄉搜捕一面防堵一面勦辦捻匪二月初五六等日有穎上阜陽等處捻匪數千人自固

始徐家灘過河到期思集焚槍又有月股千餘人由光息竄來當派參將慶瑞等率領兵勇截殺追至烏龍集河邊斃匪百餘名初七日該匪復聚五六千人欲攻固始縣城當經我兵擊退至武昌省城情形旬日以來屢據探報武昌城守嚴密賊鋒已挫現盤踞漢口並有分股至麥旺嘴長江埠一帶擄掠船隻米糧等物且有上

竄荆襄之謠目前汝郡信陽等處既不敢稍疏
防範而光固勦辦捻股堵禦六安逆匪又當喫
緊之時夙夜運籌寢食俱廢乃蒙亳股匪忽於
初八日竄入豫省攻陷永城臣擬親馳勦辦奈
南路此時亦萬分喫緊勢難遠離歸德待援甚
急且該郡與山東曹單等縣僅隔一河恐其竄
至虞城擾及東境現已飛咨河臣山東撫臣一

體嚴防並檄飭省城妥爲戒備一面飛調省標
及內黃營各兵令守備根齡等星夜帶往宋郡
聽候徐廣緒遣派截剿至此股賊匪探係皖省
土匪由蒙亳竄入是否土匪假扮長髮抑係長
髮捏冒土匪現飛飭確探臣卽帶兵馳往督剿
英桂又奏言查臣舊有肝胃之證虛氣沖逆喘
促益增遇事稍一用心更覺目眩心悸精神委

頓可否仰懇

簡派大員幫辦如臣病日減固當力效馳驅卽或日久
不痊而經理有人亦不致貽誤

國事奏入

上命軍機大臣傳諭英桂曰英桂久任外省司道大員
於地方形勢何處緊要鄰省賊氛何路切近本應早
事籌防况簡任巡撫兼管提督全省軍務皆其專責

乃株守汝甯於探報楚省賊蹤既未詳確徒以堵禦
六安逆匪爲辭竟不知永夏兩縣業被竄擾旬日所
報光固勦辦擒匪獲勝現有柏山在彼搜捕辦理防
堵該撫何以不移營疾向歸陳一帶迅速迎勦賊匪
已入境內尙未探明是否假冒直是形同聾瞶所患
肝疾並非急證現當事勢喫緊之時豈得以精神委
頓自占地步湖北賊船已由金口上竄岳州直趨湘

陰其荆襄上游未據報有賊蹤仍當飭令柏山隨時
確探盡力防範近日該撫奏事遲緩甚至各路軍營
及他省督撫報到數日而英桂於本省軍情與賊勢
猖獗尙未探明詳奏豈空言寢食俱廢便能了事耶
註明未到之前徐廣縉能否堵禦所派赴援官兵七
百名是否足資勦辦現在如何籌畫布置卽著詳細
速奏儘稍事遷延致賊匪更竄他處惟英桂是問

同日和春福濟奏言查鳳陽一帶時有土匪出沒搶劫頻聞現已分撥兵勇勦除散則易捕誠恐一設糧臺垂涎嘯聚袁甲三所議極爲有見但請仍歸徐州辦理則大有窒礙鳳陽距營二百七十餘里已苦轉運稽遲若再遠數站千里齎糧必致貽誤且奉撥軍餉山陝則由河南而至穎郡江浙則由揚儀而達滁和赴廬州均屬

直捷如令繞赴徐州往返數百里殊非慎重之道袁甲三駐兵潁宿自以徐州爲便然其隨營兵丁僅四百餘名所募義勇雖多無須計口授食與此閒兵勇月待餉需者迥別惟有仲懇

天恩飭下山東山西陝西浙江江西甘省各督撫將應解安徽兵餉徑由鳳陽定遠解赴廬州臣等飭令沿途兵勇團練逐程押護以免疏虞而資接

濟奏八

上命軍機大臣傳諭和春福濟曰前以皖省軍情緊急於福濟奏報內批令數日卽發一報以慰朕念並令傳諭和春知悉茲閱和春福濟所發奏報於廬州賊情及現在如何攻剿之處並未提及一字該提督所辦何事竟置之不論不議實屬不知輕重所請將各省奉撥軍餉徑解廬州著照所議辦理該提督等卽

分投迎提以資接濟

二十四日

癸巳

僧格林沁勝保奏言該逆自十五

日大創之後連日堅匿拒守若徒事力攻不特
損傷精銳且恐該逆被攻情急拚命撲出又成
紛竄之勢賊自束城潰竄經官軍殲斃過半所
踞縣城及附近一二村莊地方狹小比在東城
等村時較易合圍現已挑築長濠密布樹柵該

逆兩次衝撲未能竄出俟卡圍既合卽當設法
進攻惟北賊漸可翦除而南賊復由豐工二壩
渡河順隄西竄善祿已帶馬步官兵馳往堵剿
臣勝保復添派副都統魁福帶吉林馬隊五百
餘名卽日起程前往以繼善祿之後並嚴飭相
機迎擊使賊不敢北犯又派副將邱聯恩帶兵
移紮景州扼賊南竄臣等一面將阜城逆匪設

法攻勦並選備馬隊官兵二千儘南賊飄忽北
來卽令馳往迎截臣等仍酌量緩急如東豫情
形十分喫重臣勝保卽將此開布置周妥分督
官兵親往迎勦臣僧格林沁督飭官兵將阜城
逆匪設法勦除一俟畿輔肅清卽令官兵一律
南下至臣德勒克色楞額患偏疽因軍務喫緊
未敢請假十五日與西凌阿在常家村力疾督

集賢堂卷之二
三十一
隊因瘡口未合不能久支扶病回營是以奏報
內未經敘入奏入

上命軍機大臣傳諭僧格林沁勝保曰阜城賊匪尙未
掃除淨盡南賊復行北犯事勢至此急宜迅籌勦辦
勝保著仍遵前旨卽日帶兵進駐德州一帶相機迎
勦魁福所帶吉林馬隊五百名卽飭令歸善祿軍營
併力迎擊副將邱聯恩移紮景州務須嚴飭扼守遏

賊南奔阜城附近村莊據稱地方狹小較易合圍現
已挖濠樹柵杜賊竄路著僧格林沁激勵將士設法
進攻務期及早克復至勝保善祿魁福均已督兵馳
往前路剿賊德勒克色楞又患瘡疾此時阜城賊匪
急須殄滅僧格林沁統領全軍責無旁貸若復蹈前
轍致令賊匪乘閒竄逸又滋他患該大臣豈能當此
重罪耶

同日王履謙長臻奏言聞河間之賊竄往東南
設土匪遙爲援應使山東腹背受敵深爲可慮
臣等已飛咨南河督臣帶兵扼剿一面飛咨山
東撫臣飭令各處兵勇併力堵禦現在東省曹
單一帶甚爲喫緊防守稍疏則兗沂曹州東昌
等府處處可通山東撫臣駐紮德州一帶勢難
兼顧臣等又無兵勇可撥且聞歸德府屬土匪

聞

未散所有劉董二口船隻已飛飭武隆額等拆
毀淨盡並竭力堵禦免致賊匪乘虛北渡臣等
仍赴上下游各河口嚴密巡防不敢稍涉鬆懈
奏入報

二十五日甲午袁甲三奏言據徐州鎮道函稱賊

由蕭縣西北之黃家口分據豐工下游之包家

樓欲紮筏渡河十九日臣馳抵黃河南岸之北
辰集會商徐州鎮道分路進剿並據紳士到營
稟稱賊到包家樓搭橋紮筏自十六日至十八
日陸續渡完竊思賊行飄忽現既前後相差兩
日斷難追及且徐州已保無虞現有之土匪鎮
道兵勇足敷剿辦臣連日接南路稟函雖無續
竄之賊而門戶洞開人心驚恐且土匪乘機嘯

聚刻刻懸心擬卽折回宿州查看情形何處喫
緊卽馳赴何處勦辦已竄之賊旣不能及總期
嚴堵南路不使續來臣現處時勢幾於四面皆
敵惟有隨時知照提臣和春撫臣福濟以期聲
勢聯絡斷不敢畏難苟安稍涉趨避

袁甲三又奏言此股逆匪係去歲十一月自揚
州竄出益以金陵之賊不滿萬人由安廬舒桐

六安正陽一路分爲三起陸續前行意在接應
河閒之賊經過地方並不盤踞現聞河閒之賊
所餘無幾北路大兵雲集似尙不難剿除也

同日百勝王夢齡奏言查逆匪由黃家口擾至
黃河渡口覓船不得將附近村莊房屋拆毀運
至豐工下游之包家樓平水處所紮筏日夜趕
渡現在黃家口包家樓一帶尙有賊匪盤踞據

該處土人聲稱實係土匪並非逆賊當此風鶴
時警人心驚惶無論逆賊土匪均應趕緊殲滅
除星夜進兵勦辦外相應請

旨飛飭東省迅撥重兵嚴密堵禦臣等雖因保守郡城
究未能杜賊竄渡實屬咎無可辭並懇將臣等
交部嚴議均奏入

上命軍機大臣傳諭袁甲三日現在徐州雖保無虞糧

臺重地必應嚴爲防範百勝等所帶兵勇無多深恐
難資堵禦前有旨令袁甲三趕緊赴援遏賊北竄該
給事中豈不知權其輕重以顧大局轉以徐州鎮道
兵勇足敷勦辦爲詞希圖卸責又以賊已渡河追勦
不及藉口折回僕僕在道總未見賊豈不知愧恨耶
袁甲三自到皖省以來疊次勦辦土匪尙屬出力及
逆匪蠶擁北犯踉蹌趨避朕倚任該給事中不爲不

專宜如何竭盡心力乃株守宿州總未與賊接仗朕
實不解況刻下河閒竄匪死守待援旣據奸細供稱
南北之賊意在援救河閒萬一乘虛奔突不惟勾結
堪虞轉致分我兵力該給事中如趕緊跟追相距亦
祇兩日安見竟不能及且旣稱南路稟報尙無續竄
之賊何以徑行折回置北來之賊於不顧本日已諭
百勝等嚴守徐州能否布置得宜朕心實深懸繫該

給事中現旣折回若再令北來更屬緩不濟急著卽
督飭兵勇盡力之所能爲杜截南路竄匪不准稍有
疏虞儘再貽誤事機自問當得何罪

又命軍機大臣傳諭百勝王夢齡曰賊匪由黃家口
包家樓一帶竄渡黃河並有直撲徐城由荆山橋北
竄之意袁甲三追賊不及已折回宿州百勝等所帶
兵勇及調募河兵練勇並招致民勇等項約計尙有

數千著卽於口岸緊要處所分布扼守至山東南路
情形喫重已有旨派善祿等帶兵策應百勝等務當
先就現有兵勇力保郡城若因黃河斷流無險可扼
任令大股賊匪陸續竄渡朕必將該總兵等從重治
罪

上諭內閣曰豐工下游包家樓一帶現有土匪假充逆
賊紮筏渡河百勝等未能杜其偷竄均屬罪有應得

除淮徐道王夢齡前經革職暫留本任外徐州鎮總兵百勝著卽革職仍暫留本任與王夢齡督帶兵勇迅將股匪剿除淨盡江南河道總督楊以增未能先事籌防並著交部議處

同日曾國藩奏言貴州黎平府知府胡林翼前經督臣吳文鎔奏調湖北差遣該員自帶練勇六百名由黔赴鄂於正月下旬馳抵金口適值

黃州師潰賊艘上竄該員所募黔勇係山民不習水戰不能前進臣擬先遣陸勇與該員會合援鄂又值賊匪竄擾岳州湘陰臣思岳州一帶既被竄擾自當先攻克岳州不使南北梗塞方能全師東下現擬札飭該員暫駐岳州附近地方臣迅卽派員督勇先行會剿奏入報

同日

上諭內閣曰湖北巡撫崇綸現在丁憂著開缺暫留湖北協同辦理防勦事宜